



## *Pastoral Leta Bilong Bisop Bilong Vanimu*

### **SANAP STRONG LONG BILIP BILONG YUPELA!**

11-06-2006

Dia ol Brata na Susa,

#### **Tok Giaman Insait long Buk na Muvi 'Da Vinci Code'.**

Nau yet i gat planti toktok i wok long kamap long PNG bikos long wanpela buk na muvi. Ol i kolim dispela buk na muvi *'The Da Vinci Code'*. Dispela buk i stap pinis long planti buk-stoa long olgeta hap bilong graun na ol i wokim pinis wanpela muvi long dispela buk. Dispela muvi i kam pinis long kantri bilong yumi, na i no longtaim em bai kam insait long Daiosis. Planti manmeri long Vanimu bai i kisim dispela muvi hariap tru bikos yumi stap long dua bilong Esia, maski gavman i givim tok-orait o nogat. Planti lain husait i ridim pinis dispela buk i gat tupela tingting long bilip bilong ol, nau ating bai ol i lusim bilip bilong ol.

Yumi save long histori bilong Daiosis bilong yumi, long ol kago kalt na sampela tumbuna bilip bilong ol pipel insait long Daiosis; na long dispela as, yumi mas lukaut bai dispela buk na piksa nogut i noken bagarapim tingting bilong planti bilip manmeri.

#### **I. Wanem samting i stap insait long buk 'Da Vinci Code'?**

Man i raitim dispela buk i tok olsem em i kisim olgeta toktok insait long ol buk bilong histori (wanem samting ol manmeri i bin raitim bipo). Tasol samting tru em olsem, dispela buk *Da Vinci Code* i autim tingting nogut bilong Dan Brown yet na i tok nogut long Katolik Sios na Kristen bilip.

Hia em sampela samting insait long buk we i bagarapim tru Kristen bilip na bai i mekim yupela i kirap nogut:

1. Jisas em i no God. Em i bikman nating tasol. Konstentain, king bilong Rom, i bin mekim Jisas i kamap god long yia 325;
2. Jisas em i man nating na i bin maritim Maria Magdala na i kamapim wanpela pikinini meri na lain tumbuna bilong em i stap yet nau;
3. Baibel em i no tru bikos Konstentain i bin kamapim long yia 325;
4. Katolik Sios i bin haitim ol dispela samting bipo yet inap nau.

#### **II. Ol dispela toktok insait long buk i giaman tru.**

Man husait i raitim dispela buk, Dan Brown, i tok em i raitim dispela buk bihainim histori, tasol olgeta saveman bilong Histori na Baibel i tok em i giaman. Olgeta buk insait long Nupela Testamen em ol i bin raitim bipo long yia 100 A.D., na ol dispela buk i tokaut olsem Jisas em i God. Mipela i save olsem olgeta Aposel i bin dai long givim witnes olsem Jisas em i God.

Dispela bilip, olsem Jisas em i God, i bin kamap strong bipo yet long nambawan senseri o long taim bilong ol nambawan Kristen (yia 33-99 A.D.) I nogat wanpela toktok i stap long wanpela hap we i ken strongim dispela toktok, olsem, Konstentain i kamapim buk Baibel long yia 325.

Long dispela toktok olsem Jisas i bin marit, Baibel i tokim yumi Jisas yet i tokaut strong olsem marit laip em i holi, tasol long wankain taim tu em i tokaut olsem em yet i no marit. Em i givim laip bilong em long mekim wok bilong Papa bilong em. Nupela Testamen i tok klia tru long yumi olsem Jisas em i God na Jisas i no bin marit. Ol toktok insait long *Da Vinci Code* i giaman tasol. Em i kaikai bilong ol paul driman na em i traime long bagarapim Bilip Katolik.

#### **III. Dispela em i no nambawan taim long ol man i tok Jisas em i no God.**

Bipo, bipo yet, planti manmeri i bin tok Krai em i no God. Yumi ken tingim tripela taim long histori we ol i bin tok Jisas em i no God.

- *Long de Krai i kirap long indai:* taim ol soldia i tokim ol het pris long wanem samting i bin kamap, ol het pris i givim bikpela mani tru long ol na tokim ol long giaman olsem: *"ol disaipel bilong em i bin kam long nait na stilim bodi bilong em taim mipela i silip". (Mt. 28:13)*
- Sampela bilong ol nambawan lain Kristen i bin tok Jisas em i no God (1 Jn.1: 18-22).
- Namel long yia 300 na 399, wanpela pris, Arius, i bin mekim giaman tok olsem God i bin wokim Jisas antap moa long ol arapela man, tasol Jisas yet em i no God. Dispela giaman skul i bin kamap bikpela tru na i paulim planti lain tru. Kaunsel bilong Nicea long yia 325 i painim olsem Arius i giaman na bagarapim Kristen bilip na Katolik Sios i rausim em long Sios. Dispela giaman tok bilong Dan Brown olsem Jisas em i no God, em i no nupela insait long histori. Planti arapela kain giaman toktok olsem i bin kamap pinis bipo, na bai i kamap gen olsem na yumi mas was gut long dispela.

#### **IV. Ol Aposel i bin mekim wanem long ol dispela kain giaman toktok.**

Mipela i painim planti wankain samting i bin kamap insait long Nupela Testamen. Tasol ol Aposel i bin bekim hariap. Kain olsem:

- Long taim bilong Santu John, sampela Kristen i lusim bilip Katolik na i tok Jisas em i no God. Santu John i skulim ol bilip manmeri olsem: *"Ol pikinini bilong mi...bipo yupela i bin harim tok long birua bilong Krai bai i kamap...Pastaim ol dispela man i bin stap wantaim yumi, na ol i lusim yumi na i go. Tasol ol i no bin stap lain bilong yumi tru...Man bilong tok giaman em husait? Em i dispela man i save tok, "Jisas em i no dispela man God i makim bilong kisim bek ol manmeri bilong en. Man i givim baksait long Pikinini, em i givim baksait long Papa tu." (1 Jon 1:18-22)*
- Santu Pol yet i bin bungim sampela manmeri husait i givim baksait long skul bilong em long Jisas Krai. Taim em i painim aut olsem ol manmeri i wok long daunim skul bilong em, em i tokim ol Galesia long noken bilipim wanpela man o meri husait i laik senisim skul em i bin givim pinis. Em i givim strongpela tok olsem: *"Sampela man i wok long paulim tingting bilong yupela tasol, na ol i laik senisim nabaut Gutnius bilong Krai. Tasol sapos mipela yet i autim gutnius long yupela o sapos wanpela ensel bilong heven i autim, na sapos dispela gutnius i no wankain olsem dispela gutnius bipo mipela i bin autim long yupela, orait man i mekim dispela pasin em i ken lus long hel." (Gal 1:6-9)*

#### **V. Bai yumi mekim wanem long dispela buk na muvi?**

Pastaim tru, yumi mas save olsem *Da Vinci Code* i laik bagarapim na daunim bilip bilong yumi. Tasol sapos yumi lusim bilip bilong yumi long Jisas husait i God na long kirap bek bilong em long indai, yumi lus pinis. Tru tumas, Santu Pol i tokim ol Korin: *"Na sapos i tru God i no bin kirapim Krai, orait bilip bilong yupela i no inap helpim yupela. Yupela i stap yet long sin bilong yupela. Na ol man i bin bilip long Krai na i dai pinis, ol tu i lus pinis." (1 Korin 15:17-18)*

Olsem na sapos ol dispela kain hevi i bungim yumi, yumi mas banisim bilip bilong yumi na bilong ol bratasusa bilong mipela. Yumi mas banisim bilip bilong yumi long dispela rot:

- *Kirapim bek bilip bilong yumi long Baibel, em i Tok Tru bilong God. God i no inap long giamanim yumi;*
- *Mekim Baibel i kisim nambawan ples insait long prea rum long haus bilong yumi;*
- *Ridim Baibel moa yet. Ridim olgeta de wantaim famili bilong yu na long yu yet tu;*
- *Statim Baibel grup insait long Paris na long ples bilong yu;*
- *Askim Paris Pris long toktok long dispela samting, na long kamapim wanpela bung we ol pipel i ken skelim dispela toktok;*
- *Putim yau oltaim long Katolik Redio bikos i gat ol gutpela progrem long Baibel olsem Tok bilong God;*
- *Amamas na sanap strong long bilip bilong yu na helpim ol lain husait i gat tupela tingting long bilip bilong ol.*

Long dispela taim nau, nem bilong Jisas i bagarap olgeta na Jisas i pilim bikpela pen tru. Yumi no ken lusim em i stap wanpis olsem long dispela taim long Gaden Oliv. Yumi mas sanap strong na

soim bilip bilong yumi. Jisas i tok: “*Man i save tokim ol manmeri olsem em i stap long lain bilong mi, mi tu bai mi tokim Papa bilong mi long heven olsem dispela man em i bilong mi. Tasol man i tokim ol manmeri olsem em i no bilong lain bilong mi, mi tu bai mi tokim Papa bilong mi long heven olsem dispela man em i no bilong mi.*” (Mt. 10:32-33)

God i ken blesim yupela na givim grasia long yupela long sanap strong long bilip bilong yupela.

Mi Bisop bilong yupela,

+ ***Cesare Bonivento, PIME,***

***Bisop bilong Vanimo.***

***Pestode bilong Holi Triniti***